

Towerlantern Fotografie

fotografienuus

januarie 2018



"Indringer in feetjeland"

Lensopening f2.8; Sluiterspoed 1/160 sekonde; Fokale lengte 100 mm

Ons staan aan die begin van 2018. Seënwense vir hierdie jaar en mag jy elke dag die seën van die Here ondervind. Mag jou lewe net vrede en vreugde wees. Mag jou fotografie van krag tot krag gaan en mag jy elke oomblik daarvan geniet.

Saam met hierdie nuwejaarswens neem ons aan dat daar allerlei fotografie-voornemens aan jou kant is. Van ons kant wil ons help en ons noem 'n paar sake wat in die loop van die jaar gaan gebeur en wat jou kan help met jou voornemens.

Ons beplan om DV onder andere aandag te gee aan die volgende:

- Eerstevlak-kursusse elke kwartaal
- 'n Foto-uitstalling in die tweede semester
- Tweedevlak-kursusse elke semester
- Korter of langer uitstappies

Lees in hierdie uitgawe nog meer oor die betowering in foto's, veral toegepas op stillewe-foto's, en maak gebruik van die riglyne wat ons gee.

Hoe presies is jy in jou daaglikse werk? Of dit nou wiskunde of musiek is, jy sal saamstem dat presisie belangrik is. Moet dus nie ons artikel oor presisie laat verby gaan nie.

Voorbladfoto

In die vorige uitgawe van *Fotografienuus* het ons daarvoor gepraat dat 'n fotograaf altyd die onverwagse moet verwag. En ons het 'n paar foto's gewys en daarvoor gesels. Die voorbladfoto van hierdie uitgawe, *Indringer in feetjieland*, is nog so 'n onverwagse foto. Die bedoeling was nie om indringers te vang nie, maar skielik was dit net daar met spinnerak en al. En met hierdie treffende titel is die hoop dat dit 'n trefferfoto is.

Die tegniese besonderhede van die foto word gegee. Let verder ook op na die volgende:

- Die spindrade in die foto is nie oral skerp nie weens die baie vlak velddiepte (lensopening f2.8) en
- die agtergrond bestaan uit kwashale wat verder bydra tot die betowering-karakter van die foto.

Volgende kursusse

Op enige tydstip is ons by Towerlantern met minstens twee van die volgende vier fotografiekursusse aan die gang:

- 'n Eerstevlakkursus in Potchefstroom. Die volgende eerstevlak-fotografiekursus begin reeds op 10 Januarie en duur tot 6 Februarie. Daar word tipies vier sulke kursusse per jaar aangebied, een per kwartaal.
- 'n Gevorderdevlakkursus in Potchefstroom. Die volgende een begin op 14 Februarie en duur tot 7 November. Daar word tipies twee sulke kursusse per jaar aangebied, een per semester.
- 'n Aanlyn-eerstevlakkursus. Dié kursus is deurlopend, en kan op enige tydstip begin word. Sodra die inskrywingsgeld betaal is en die registrasie gedoen is, begin die kursus.
- 'n Aanlyn-gevorderdevlakkursus. Ook dié kursus is deurlopend, wat beteken dat sodra die inskrywingsgeld betaal is en die registrasie gedoen is, die kursus begin.

Die studente van die eerstevlakkursus kan met die gevorderde kursus aangaan. Die aanlynkursusse het die voordeel dat dit wêreldwyd aangebied word. In hierdie tyd waar Afrikaans oral uitgewerk word (met die Universiteit van die Vrystaat die jongste voorbeeld) is dit lekker om te weet dat hierdie kursusse in Afrikaans beskikbaar is, van Argentinië tot Ysland, by wyse van spreke.


Riglyne: Stillewe met betowering

Ons beplan om elke maand 'n stel riglyne te gee vir die fotografering van een of ander foto-onderwerp. Die bedoeling is om die kamera-instellings resepmatig te gee om jou sodoende te help om op dreef te kom.

Ons gesels hierdie maand oor stillewes met betowering. Ons sal die begrip "stillewe" redelik wyd verstaan. Dit kan 'n opgestelde stillewe wees of 'n gevinde toneel. Met "gevinde toneel" word bedoel dat dit 'n toneel is wat reeds reg staan en as't ware net wag om afgeneem te word, soos die voorbladfoto. Kry dus 'n toneel met betowering reg. Lees hiervoor weer die riglyne wat in die Desember-uitgawe van *Fotografienuus* gegee is.

Aanvaar nou::

- die foto-toneel is reeds opgestel
- die kamera is op 'n driepoot en
- daar is 'n redelike komposisie en fokussering gedoen.



Volg dan hierdie voorskrifte:

- *Tipe lens*: Maak self 'n keuse. 'n Makrolens kan handig wees.
- *Portret-/Landskapformaat*: Kies die formaat volgens behoefte.
- *ISO*: Hou die ISO-waarde laag. Verhoog dit slegs as dit nodig is.
- *Witbalans*: Maak seker van die eksterne beligting en eksperimenteer deurgaans met spesiale effekte in gedagte.
- *Keuse van fokuspunt*: Moenie vergeet dat jy met stillewefotografie besig is nie. Kies dus 'n geskikte fokuspunt of -omgewing. In die geval van betowering kan jy besluit dat jy wel net enkele punte in fokus wil hê.
- *Lensopening*: Tipies is die velddiepte klein; gebruik dus 'n groot lensopening.
- *Sluiterspoed*: Gebruik soos altyd die liniaal vir die korrekte beligting.
- *Fyn fokussering*: Moet weereens nie vergeet dat jy met nabyfotografie besig is nie. Fokusseer dus reg en op die regte plek.

Ons hoop jy kom reg. Jy is welkom om enige tyd te bel en navraag te doen. Ons sluit af met die volgende: Om betowering in foto's weer te gee, het jy self betowering (in die vorm van inspirasie) nodig. Dit kom nie noodwendig maklik en vanself nie. Een manier is om in oefening te kom, en dalk is jy gelukkig om 'n foto soos die meegaande te kry.

Nog 'n manier om op hierdie pad te kom en te bly is om na kunswerke met betowering te kyk. Besoek dus ook onder andere kunsfotografe se webblaaie. Die foto's van Sue Bryan (<http://www.suebryanphotography.com/>) is die moeite werd om te bestudeer (hoewel nie alle foto's stillewes is nie).

PRESISI ... Presisie ... *Presiesi...* Presiesie

Ons beklemtoon altyd skerpte in foto's. En almal stem saam dat dit 'n belangrike fotografiese saak is. Daar is natuurlik nog baie ander sake by die neem van foto's wat ook belangrik is. Die punt wat ons wil maak is dat as jy goeie foto's wil neem, dan moet daar noukeurigheid en presisie wees in wat jy met jou kamera doen.

Almal sal ook saamstem dat daar veel meer dinge in die lewe is waar noukeurigheid belangrik is. In Wiskunde byvoorbeeld is daar 'n groot verskil tussen x^2 en x^3 , of tussen spoed en snelheid. En elkeen sal uit sy/haar eie werksterrein talle voorbeelde kan aanhaal. Die punt wat ons wil maak is dat as jy goeie werk wil verrig, dan moet jy noukeurig wees in wat jy met jou werk doen.


Jy sal ook saamstem: As jy met jou motor ry, gebruik jy die koppelaar só dat die kar nie rukkerig wegtrek nie. Ook stop jy by 'n stop; jy ry nie oor 'n rooi robot nie, ensovoorts. Die punt wat ons wil maak is dat as jy gemanierd wil ry, dan moet jy noukeurig wees in wat jy met jou motor doen.

Stem jy nog saam? Ons hoop so: Ons hou daarvan om 'n fotografiekursus by te woon. Dis altyd intresant. Ek hou lings as ek met my moter na 'n klas toe ry. En ek vra onverskoning as ek huidiglik nie 'n klas kan bywoon nie. Ek sal die verskooning baie waardeer.

Teen hierdie tyd snap jy sekerlik die punt; en hopelik stem jy nog saam: Ons streef daarna om presies te wees in fotografie, en ook nog in baie ander sake, maar as dit by ons taal kom, dan is die noukeurigheid daarmee heen! Die punt wat ons met hierdie *refrein* wil maak is dat as jy jou taal wil praat, dan moet jy ook noukeurig wees in hoe jy dit skryf.

As ons met hierdie opmerking maar net een persoon kan motiveer om moeite te doen om korrek te spel, dan het ons al een persoon vir ons taal gewen. Vir taalpret en -plesier kan jy die Beter Afrikaans-app aflaai op jou selfoon.

Painting with a lens



Die kuns van goeie fotografie is dat jy nie net 'n foto van die werklikheid *neem* nie maar dat jy dit eerder *skep*; en ook dat jy ook gevoel in die prent plaas. Dink maar aan wat 'n skilder doen – die geskepte toneel is selde die presiese werklikheid, dit is veel eerder iets van die skilder self.

Doen dit met jou foto's en kyk watter hoogtes jy bereik. Ons het voorheen gesels oor die boek "Painting with a lens" van Rod & Robin Deutschmann. Die voorblad hierby is 'n treffende voorbeeld van hoe jy met jou kamera kan skilder. En hier is nie agterna-verwerking gedoen om dit so te kry nie.

Januarie se foto-uitdaging

Ons foto-uitdaging vir Desember het geen foto opgelewer nie. Ons begryp dat van ons lesers op vakansie is of gegaan het, of dat daar dalk nie so ver af in die teks gelees is nie, of dat die jaar bloot net sy tol geëis het. Ons herhaal dieselfde uitdaging dus vir Januarie.

Hier is dan die foto-uitdaging vir Januarie, en dit kan jou 'n prys van R300 in die sak bring. Die beoordelaars soek na die beste foto wat betowering uitbeeld. Die foto moet in die vorm van 'n miniatuur toneeltjie wees en dit moet geneem wees gedurende die tydperk 1 Desember 2017 tot 31 Januarie 2018. Lees weer die wenke wat in die vorige maand se *Fotografienuus* gegee is.

 Towerlantern Fotografie

facebook

Towerlantern Fotografie se basiese bedoeling, en ook die oorspronklike rede waarom dit tot stand gekom het, is om opvoedkundig van aard te wees. En dit geld in die besonder ook vir Towerlantern se Facebook-blad. Die Facebook is dus allermens 'n kletsblad – en ons noem hierdie saak, want daar is baie mense wat juis om dié rede 'n onliefde vir Facebook het. Maak asseblief dus maats met Towerlantern Facebook en kyk na die verskillende foto's en sake.

Ons sê Towerlantern se Facebook is opvoedkundig van aard. Daarmee word nie bedoel dat dit leeragtig (pedanties as jy wil) of voorskriftelik wil wees nie. Dit bedoel wel om vol allerlei interessante en leersame dinge te wees.

Ons het weekliks 5 rubrieke volgens die onderstaande patroon:

Maandæ: Foto's van ons fotovriende

Dinsdæ: Kunsfotografie

Woensdæ: Kamera- en fotowenke

Donderdæ: Uit die verlede

Vrydæ: Op internet gesien

Die temas by hierdie rubriekindeling spreek vir hulself en behoort duidelik te wees. Dit is ook dieselfde as wat dit die afgelope maande was. Geniet dit, deel dit, en lewer gerus kommentaar. Jou bydraë sal altyd welkom wees.

wenk

As jy jou kamera by die huis vergeet het, of die batterye is pap... Haal jou selfoon uit! Meeste moderne selfone het allerlei funksies – speel vooraf daarmee rond!

Towerlantern Fotografie
-januarie 2018-

Op internet gesien

Een van ons weeklikse Facebook-rubrieke is "Op internet gesien". Miskien is dit juis nie jou sterkte om op internet rond te swerf nie. Laat dit dan aan 'n jonger persoon oor om dit vir jou te doen, in hierdie geval Fransa Vorster, een van die administrateurs van Towerlantern se Facebook en ook die versorger van Fotografienuus.

Die soekenjin Bing, het elke dag 'n treffende agtergrondfoto. Blaai gerus daardeur by <https://www.bing.com/> en verlustig jou in die interessante foto's. 'n Onlangse foto is geneem deur Per-Gunnar Ostby van makaakape in Japan se Jigokudani Aappark.



Wonder jy hoe foto's van stillewe-items geneem moet word so dat daar net 'n witheid in die agtergrond is? Het jy al gesukkel om so iets reg te kry? Moenie moedeloos word nie – die internet sal jou wys hoe.

Die idee is om 'n ligboks te bou. So 'n ligboks kan gebruik word om items af te neem, maar met 'n eenvormige agtergrond so dat dit dan vir produkfotografie gebruik kan word.

Kyk gerus by <https://www.photoblog.com/learn/20-photography-hacks-will-get-amazing-results/> en ook nog vir ander fotografie-aktiwiteite en idees!

Redakteur: Johan de Klerk Bladuitleg: Fransa Vorster van Colourcode Designs